

1

**CONFERENCE
DES EVEQUES CATHOLIQUES
DU BURUNDI
B.P.1390 BUJUMBURA**

**IJAMBO RISHIKIRIJWE N'ABEPISKOPI GATOLIKA B'I BURUNDI
RIJANYE N'AMATORA YO MU 2010**

**NITWITEGURIRE NEZA AMATORA YIMIRIJE KUGIRA
NGO ADUFASHE GUTSIMBATAZA AMAHORO**

Bavukanyi dusangiye ukwemera,
Barundi, Barundikazi mwese,

Turabaramukije amahoro y'Imana.

Mu bihe vy'amatora mu Burundi, twaragiye turabashikiriza ijambo riyerekeye. Twarababwiye akamaro kayo, turabashikira no ku bikenewe kugira ngo amatora agende neza.

N'uno munsi dushaka kubashikira ku ntumbero ibereye, ivyiyumviro twokwisunga, kugira ngo amatora yimirije azobe meza, adufashe gukomeza amahoro n'umutekano, kunagura no guteza imbere ubutunzi bw'igihugu cacu.

I. Akamaro k'amatora

Igihe c'amatora ni igihe co kurimbura n'ugukomeza intwari rusangi. Ni bande barimbura? Ni abenegihugu, bo bene ubutegets, mu mirwi yabo yose. Ni abatwara mu nzego zose z'igihugu. Ni abashaka gushikira ubutegets bacye mu migambwe canke bigenga. Barimbura iki? Abenegihugu barimbura ingene abo bahaye ubutegets babukoresheje mu kurangura imigambi bari bashikirije, mu kwubahiriza agateka ka zina muntu, mu gukomeza umutekano n'amahoro, mu gukoresha neza itunga ry'igihugu ku neza ya bose no mu guteza imbere igihugu.

Abatwara nabo barimbura ingene bashimishije abenegihugu, ababatoye n'abatataboye, mu kurangura imigambi bari bemereye igihugu n'ibindi vyose biza bigiteza imbere. Abashaka gushikira ubutegetsi barimbura ico bafashije mu gukomeza intwari rusangi no mu gufasha mu buryo burekuwe n'amategeko, ngo abari ku butegetsi barangure imigambi bari bishinze.

Igihe c'amatora ni igihe kandi c'ugushikiriza ivyipfuzo n'imigambi iyo migwi yose (abenegihugu, abatwara n'abipfuzwa gutwara) yoshira imbere mu kiringo cimirije, kugira ngo igihugu kiroranirwe kandi kironke akunguko.

Ukwitorera abatwara ni uburenganzira n'iteka ry'umwenezi wese. Nico gituma abenegihugu bokwitaba amatora batagonanwa. Egome, amatora ni ikiringo gihambaye c'intwari rusangi, mugabo jyo ntwari ntihagaze ku matora gusa. Intwari rusangi ishimikiye cane cane ku banyo abenegihugu bakoresha uburenganzira bwabo bwo kugenzura, ata gitsure n'ugukandamizwa, ingene batwarwa. Intwari rusangi ishimikiye kandi ku buryo abatowe batwara igihugu mu kwubaha n'ukwubahiriza abenegihugu bose, mu gutegeka babanje kwumviriza abenegihugu bose, imigambi myiza yatumye batorwa bakayirangura bafatanije n'abo abenegihugu nyene. Maze ivyo vyose bakabirangurana umutima ukunda igihugu, ukarondera ineza ya bose.

2. Amakenga dufise ubu

Amakenga dufise ubu ni uko abenegihugu bashobora kubura umwitegemvye mu matora, kubera igitsure n'ibirwanisho bikiri vyinshi mu gihugu. Hari abohava bavyitwaza canke bakabikoresha, yaba imigwi yegamiye imigambwe canke abandi, kugira ngo batere ubwoba abenegihugu.

Ayandi makenga dufise ubu ni uko amategeko agenga amatora atarajya mu buryo, kandi turiko turateba.

Hari n'impari ziterwa n'abariko barahiganirwa ubutegetsi zituma batayumvikanako. Bamwe bose bikwegerako ngo baronke itegeko ryobafasha gutsinda amatora.

3. Ivyotuma amatora aba meza

Ica mbere n'ugushinga amategeko atunganya neza amatora.

Turasavye abari mu nzego zishinzwe iryo banga ntibitwararike ineza y'umugambwe barimwo gusa, ariko bashire imbere ingingo zizotuma amatora aba ku mugaragaro, mu mutekano no mu mahoro, ata n'umwe arenganijwe, kugira ngo igihugu ntigisubire mw'ihumbi.

Ica kabiri ni ihiganwa ryiza ry'imigambwe.

Amatora aba meza iyo imigambwe ihiganwa ishira imbere imigambi myiza n'ondera meza ya bose, ikabigira yubahana, yirinda gushamirana, gurtyozanya, ikwubahiriza amategekoko, igakoresha ubwenge, ubuhinga n'ubutwari.

Abagiye mw'ihiganwa ry'amatora bipfuzaga gutsinda. Ariko bomenya ko haburana babiri hagatsinda umwe. Aboramuka batsinzwe bokwemera bagashira aho intahe ishize. Uwovugaga ngo : "Ntatsinze ibara rizogwa", yoba atarategere intwari rusangi icyo ari cyo.

Ivyabaye mu matora amwe amwe muri kahise k'igihugu cacu n'ivyo twumva mu bihugu bimwe bimwe vya Afrika vyotubera icyigwa.

Mu ntwaro rusangi ko haba impari mu bahiganwa ni ibisanzwe. Ariko iyo bose bashize imbere ineza y'igihugu, bokwemera kwicara hamwe ngo bumvikane. Vyanse bakitura inzego zibishinzwe. Izo nazo zikirinda gukoreshwa n'igitsure canke igiturire.

Turasavye ko ababijejwe boshishikara gukura ibirwanisho mu gihugu, abenegihugu nabo bemere babitange.

Ikindi cotuma amatora agenda neza ni uko ata mwenegihugu n'umwe yohatirwa gutora umugambwe canke umuntu atashimye.

GUSOZERA

Mu gusozera, dusavye abemera Imana bese, cane cane abakristu bo muri Ekleziya Gatolika, basanzwe bari mu nama y'umuryango wa diyosezi yerekeye amahoro avyawe n'ukurekurirana n'ugusubiza hamwe, ngo bashimike mu gusabira Uburundi, kugira ngo ayo matora twimirije azotubere ikiringo nyacyo co gukomeza amahoro.


Mutima Mweranda, We Mushingangiro abushitse niyame atumurikira, atwereke ukuri n'uburyo bwiza bwo gutunganya igihugu cacu.

Imana nibahezagire.

Bigiriwe i Gitega ku wa 21 Mukakaro 2009.

Ni twebwe Abepiskopi Gatolika b'i Burundi

✦ Evaristo NGOYAGOYE, Umwepiskopi Mukuru w'i Bujumbura akaba n'Umukuru w'Inama y'Abepiskopi Gatolika b'i Burundi



✦ Gerevazi BANSHIMIYUBUSA, Umwepiskopi w'i Ngozi akaba n'Icegera c'Umukuru w'Inama y'Abepiskopi Gatolika b'i Burundi




✦ Simoni NTAMWANA, Umwepiskopi Mukuru w'i Gitega



✦ Yozefu NDUHIRUBUSA, Umwepiskopi w'i Ruyigi




✦ Yohani NTAGWARARA, Umwepiskopi w'i Bubanza



✦ Yohakimu NTAHONDEREYE, Umwepiskopi w'i Muyinga



✦ Venansi BACINONI, Umwepiskopi w'i Bururi



✦ Bonaventura NAHIMANA, Umwepiskopi w'i Rutana



Iri jambo rizosomwa mu masengero yose gatolika kw'igenekerezo rya 2 Myandagaro 2009.